

Celebracion di e Tesoro Cultural di mas grandi cu nos tin

RIBA dia 21 di mei 2003 den Parlamento di Aruba un ley masha importante pa pueblo di Aruba a keda decreta, esta e Ordenansa di Ley cu ta regla Papiamento y Hulandes como idioma oficial.

Di e manera aki Papiamento, e idioma materno di mayoria di habitante di Aruba y e idioma mas uza den nos comunidad, a haya e reconocimiento cu e merece. Kiermen cu e aña aki, 2013, nos ta celebra e di dies aniversario di oficialisacion di Papiamento y pa e motibo ey a declara 2013 como Aña di Papiamento.

Esaki ta e di dos biaha cu nos tin un Aña di Papiamento: na 1997 tambe a dedica hopi atencion na nos idioma, den cuadro di e lucha pa su reconocimiento, tanto den comunidad como den enseñansa. Ademá Departamento di Educacion a dedica aña 2008 cu exito na un campaña grandi pa conocemento y bon uzo di Papiamento. Cu e oficialisacion aki a habri caminda pa sigui traha na reconocimiento di e derechonan linguistico di nos pueblo y di e derecho di nos yiunan y nan yiunan pa haya les den nan propio idioma. E derechonan aki ta stipula den algun documento masha importante di entre otro UNESCO (United Nations Educational, Scientific and Cultural Organization). Tur e documentonan aki ta describi idioma materno como e herment di mas impor-

tante pa pensa, pa comunica, pa expresa sentimento y pa desaroya.

Dicon oficialisacion

Den un pais cu un historia colonial den mayoria caso e idioma di e pueblo di e pais ey tin un posicion inferior como cu e pais colonisado a impone su idioma como e unico idioma legal, por ehempel den gobierno y den enseñansa. A y ta uza tur sorto di argumento pa tene e idioma ey for di e sectornan oficial di e pais. Hopi biaha e pueblo, pa falta di informacion, ta kere e argumentonan ey y ta menosprecia su propio idioma.

Esey a pasa na Aruba tambe y pa e motibo ey mester a lucha fuertemente pa e idioma local, Papiamento, haya a lo largo e lug a cu e merece den comunidad. E lucha pa oficialisacion di Papiamento tabata parti di conscientisacion di nos pueblo relaciona cu balor di su idioma. Poco poco Papiamento a gana reconocimiento, cu un momento memorabel den añanan 50 di siglo binti ora el a drenta Parlamento di Aruba pa keda. Hopi bos, specialmente di e hendenan den enseñansa, a resona pa Papiamento bay scol, pasobra experiencia y investigacion tabata muestra cu stoba un hende di desaroya un dominio fuerte di su idioma y strob'e siña den su idioma materno ta igual cu prohibi di uza su cerebro. Tur investigacion

tocante enseñansa, tanto local como internacional, ta muestra, cu un posicion clave di e idioma materno den enseñansa ta un condicion importante pa un enseñansa di calidad cu ta necesario pa desaroyo intelectual, social, cultural y economico di e pais.

E lucha aki a resulta masha duro mes y te ainda tin hopi hende cu no ta convenci di e balor di Papiamento pa desaroyo di e mucha, apesar di e tantisimo literatura riba e tereno aki. Apesar di e pruebanan di enseñansa preparatorio y enseñansa special caminda siñamento cu placer na Papiamento tabata tuma lug a caba, den enseñansa special for di 1979 y den enseñansa preparatorio decenas di aña prome cu esey.

Porfin, na 2003, e ley di oficialisacion a keda cla y mesora porta di sala a habri pa Papiamento drenta enseñansa secundario como materia oficial. E oficialisacion aki a duna un empuhe tambe na desaroyo di scol basico cu Papiamento como idioma di instruccion. E proyecto ey a cuminsa na 2009 y awe nos tin dos scol basico na unda e muchanan di klas 1 ta haya les na Papiamento. Un logro increíblemente grandi. Tin hopi scol cu ta ansioso pa drenta den e proyecto "Scol Multilingual" aki. E maestronan sa, cu ta proba científicamente cu e propio idioma, e idioma materno, ta di sumo importan-

cia pa siñamento di tur materia, kiermen di otro idioma tambe. Kiermen cu un bon dominio di e idioma materno ta un condicion pa desaroyo intelectual. E maestronan a y ta experiencia tur dia, con ausencia di Papiamento den nos enseñansa ta stoba desaroyo di e talentonan cu nos muchanan, nos hobennan, nos hendenan tin.

Con mester sigui

E Aña di Papiamento aki ta pa sigui cu conscientisacion relaciona cu Papiamento, pasobra, cu oficialisacion so nos no ta cla. Tin hopi trabou cu mester tuma lug a ainda, riba tur tereno di nos comunidad. Por ehempel, ta hasta asina cu e ley di oficialisacion mes ainda falta elaboracion, pa salvaguardia futuro di Papiamento.

Ainda por ehempel nos ortografia no ta oficialisa; e concepto di ley di ortografia mester sali for di e lachi hundo y keda trata mas pronto posibel.

E trabou di conscientisacion cu hopi informacion y promocion mester sigui den tur sorto di forma, pa sigura un aceptacion y respet creciente di nos idioma, sigur bou di su propio papiadonan.

Den e sentido aki enseñansa na y di Papiamento cu ta un medio importante pa nos pueblo siña acepta su idioma como e tesoro cultural di mas grandi cu e tin, mester haya tur sosten posibel. Tin hopi trabou di haci ainda

den comercio, prensa, relacion publico y farandula pa uzo y consecuentemente bon uzo di Papiamento bira un exigencia den e sectornan ey.

Lo mester bin hopi oportunidad pa siña Papiamento, tanto via programa na radio y television, como via curso y estudio na tur nivel, di nivel di principiante te na nivel di docente di grado di master.

Programa di Aña di Papiamento 2013

Departamento di Cultura a reuni intensamente hunto cu e representantenan di Fundacion Lanta Papiamento, Grupo Corector, Departamento di Enseñansa, Aruba Tourism Authority, Instituto Pedagogico Arubano y Universidad di Aruba y nan peticion na Ministro di Cultura pa proclama 2013 como Aña di Papiamento a keda acorda pa Consejo di Ministro. E comision a traha un calendario pa Aña di Papiamento cu un variedad grandi di actividad masha interesante. Lo publica e calendario aki y ta haci un apelacion fuerte na pueblo pa participa cu entusiasmo na e actividadnan aki. Ta ora pa pone tur forza y energia hunto pa celebra loke ta di nos y sigui traha riba e creacion unico aki, e wes'i lomba di nos cultura, e prueba di nos identidad, e vehiculo di nos herencia intangibel: Papiamento. Carg'e, cuid'e, sigui desaroy'e!